



Dahsau Seizcin Hozndat Lo

春姑娘生气了

Dahsau Seizcin gwih duj fwjhau daeuj gizneix ciuqseiz guh hong! Hoeng mwh de yawjraen seiqgyaiq mokfoenfoen, miz di hozndat lo.

Mbwnheu caeuq fwjhau cungj deng caengz mokfaenx nanoeknoek dangj dwk, Dahsau Seizcin cadi hozndat ndaej ngunh bae. De ci rumz hung, naemj ci mokfaenx bae, hoeng rumz baez daengx mokfaenx youh dauq lo. De doek le fwn hung, dauqdae hoenx ndaejhingz mokfaenx, loh'ok le fwjhau caeuq nditndat.

Dahsau Seizcin rox le vunz luenh gveng nyapnyaj, vihneix de ci rumz hung dawz daehsuli ci haeuj naj vunz bae, lumjnaeuz cingq naeuz: "Yawj gij saehndei gyoengqsou guh!" Bouxguh hong vanzbauj hai hong lo, dawz nyapnyaj baet seuq le, doeklaeng Dahsau Seizcin youh ci rumz hung, dawz gij daehsuli youq gwnz faex haenx ci roengzdaeuj gyau hawj bouxguh hong vanzbauj.

Dahsau Seizcin miz di baeg, hoeng mwh de yawjraen nyefaex saeknamh caeuq diegdeih ndongqndangndang, youh hozndat lo. De iet fwngz okdaeuj yungh rengz ngauz gova caeuq nyefaex, lij hemqheuh: "Vaiq hwnqmbonq ya, seizcin daeuj lo!" Gova deng heuh singj lo, gyoengqde vuenh hwnj buhvaq ndingnding heuheu, angqyangz ok dou lo. Nye goliux hix deng heuh singj lo, gyoengqde daenj hwnj le buhmoq saekheu, cung ok dou ranz bae.

Mbwn bienq heu lo, deih bienq seuq lo, dahraemx yungz lo, va nywj okdaeuj guhcaemz lo, Dahsau Seizcin angqyangz naeuz: "Seizcin daeuj lo!"

(Ngeih nienzgaep Yangz Gaijceez raiz Dahdingz hoiz)

Gyaeundei Couh Youq Henz Ndag

美就在身边

Gyaeundei, gizgiz cungj miz. Miz vunz gangj, funghgingj gyaeundei dwg gij gyaeundei caencingq, lij miz vunz gangj, gij yienghsiengq vunz gyaeundei cij dwg gij gyaeundei caencingq, gou nyinhnaeuz gij sim vunz gyaeundei cij dwg gij gyaeundei caencingq.

Miz baez ndeu, gou caeuq daxmeh yaek naengh cigoenggyau okbae liuh, dou ndwn youq baihnaj gaiq baiz aencamh caj le geijcib faen cung ci cij daeuj daengz, gou caeuq daxmeh hwnj ci le, yawjyawj seiqhenz, aen dieg-naengh ndeu cungj mbouj miz, ndaw ci ndaetfwdfwd, youq ndaw ci gou couh lumj duz moed ra diegbae ndeu, baenzlawz caenx hix caenx gvaqbae mbouj ndaej, gvaq yaep he, miz geij boux vunz roengz ci, ndaw ci mbouj ndaet geijlai lo, hoeng lij dwg mbouj miz saek aen diegnaengh, aen ga gou cungj ndwn unq liux lo, daxmeh doiq gou naeuz: "Genhciz geij faen cung dem couh daengz lo." Gou naeuz: "W."

Seizneix, miz dah cej mbouj hung gvaq gou geijlai bi ndeu sawqmwh ndwn hwnjdaeuj, naeuz: "Dahnuengx, mwngz naengh gizneix ba." Gou naeuz: "Mbouj yungh lo, dou yaek daengz lo, mwngz naengh ba." Dah cej iq haenx naeuz: "Mwngz naengh ba, gou raen mwngz ndwn youq haujlai nanz lo, haengdingh naet lo." Yienghneix, gou doiq dah cej haenx gangj le sing gyo' mbaiq, couh gvaqbae naengh yaep he. Gou caeuq daxmeh naengh le yaep he couh roengz ci lo, roengz ci le, gou itcig lumz mbouj ndaej dah cej nyiengh diegnaengh hawj dou haenx, yienghsiengq de mbouj dwg gig gyaeundei, hoeng sim de cix gyaeundei dangqmaz.

Daj gienh saeh neix, gou rox lo, vunz mbouj itdingh aeu maj ndaej gyaeundei cij dwg gij gyaeundei caencingq, aeu sim gyaeundei cij dwg gij gyaeundei caencingq.

(Sam nienzgaep Ningz Mungz raiz Dahdingz hoiz)



"Mwngz miz ndaundeiq lai baenzneix miz gijmaz yungh ne?"

"Miz ndaundeiq cix baenzsaq baenzmiz lovei!"

"Baenzsaq baenzmiz youh miz gijmaz yungh ne?"

"Langhnaeuz miz vunz raen ndaundeiq moq, gou cix cawx ndaej lailai ndaundeiq dem vei!"

Lwgvuengziq ndawcaw gag ngeix naeuz: "Boux vunz neix naemj lumj boux laeujgeq de dahraix!"

De youh cam naeuz: "Mwngz guhlawz hah ndaej doenghgij ndaundeiq neix ne?"

"Nyaenx mwngz naeuz vei, ndaundeiq mbouj dwg duh gou, dwg duh bouxlawz ne?" Boux guh gaicawx neix hozndat dauqcam Lwgvuengziq naeuz.

"Gou mbouj rox ne. Mbouj rox ndaundeiq dwg duh bouxlawz ne."

"Nyaenx ndaundeiq cix dwg duh gou lo, aenvih gou dwg boux daih' it naemj daengz hahmiz ndaundeiq."

"O, baenz yienghneix ha?"

"Dwg vei! Langhnaeuz mwngz raen naed cuenqsig ndeu mbouj dwg duh bouxlawz, yienghneix de cix dwg duh mwngz lovei! Langhnaeuz mwngz raen aen ndonj ndeu mbouj dwg duh bouxlawz, yienghneix de

cix dwg duh mwngz lovei! Couhdwg gangj, langhnaeuz mwngz naemj daengz gij doxgaiq fwx naemj mbouj daengz de, gij doxgaiq neix couhdwg duh mwngz lo! Ndigah, ndaundeiq dwg duh gou, aenvih gaxgonq mbouj miz saek bouxlawz yaek hah miz gyoengqde."

"O, gangj ndaej deng bw!" Lwgvuengziq naeuz, "Hoeng mwngz aeu gyoengqde daeuj guh gijmaz ne?"

"Gou guenleix doenghgij ndaundeiq neix. Gou suenq gyoengqde miz geijlai aen baez liux baez moq. Gaiq saeh neix hoj guh lai bw! Hoeng gou raen goj mizyinx raixcaix bw!"

Boux guh gaicawx neix guh yienghneix han Lwgvuengziq, Lwgvuengziq mbouj habhoz geijlai nauq, naeuz dem:

"Langhnaeuz gou miz diuz gaendukhoz seicouz ndeu," de naeuz, "Gou cix duk gwnz hoz dawz deuz bae. Langhnaeuz gou miz duj va ndeu, gou cix mbit dujva aeu deuz bae. Hoeng mwngz mbit aeu ndaundeiq mbouj ndaej ne!"

"Gou mbit aeu ndaundeiq mbouj ndaej, hoeng gou aeu gyoengqde rom haeuj ndaw ngaenzhangz ndaej bw."

"Guhlawz gangj ne?"

"Couhdwg gangj, gou aeu soq

ndaundeiq raiz youq gwnz sa, liux cix aeu mbaw sa coq haeuj ndaw habyt bae daep de hwnjdaeuj."

"Yienghneix cix baenz la?"

"W! Yienghneix cix baenz lo!"

Boux guh gaicawx neix han naeuz.

"Mizyinx dahraix bw!" Lwgvuengziq ngeix naeuz, "Mizyinx lumj raiz hotsei liux bw, hoeng mbouj cingqheiq geijlai ne!"

Guhlawz cingq dwg cingqheiq, youq ndaw saida Lwgvuengziq saeh cingqheiq caeuq gij bouxlaux de mbouj doxlumj saekdi bw. De laebdaeb naeuz dem:

"Gou miz duj va he, gou ngoenzngoenz rwded raemx hawj de. Gou lij miz sam goengq ndoifeiz, hophop cungj baet baez ndeu. Ndoifeizdai gou goj caemh baet dem. Bouxlawz cungj mbouj rox de seizlawz dek. Gou miz ndoifeiz caeuq dujva, gyoengqde doiq gou daeuj gangj miz yungh. Hoeng, ndaundeiq doiq mwngz mbouj miz yungh saekdi ne....."

Boux guh gaicawx neix bak ngoemxngwt mbouj miz vah gangj lo. Yienghneix Lwgvuengziq cix deuz lo.

Lwgvuengziq goj byaij goj byaij, vubvub vebveb gag naeuz: "Bouxlaux geizheih dahraix!"